

Ambassadors romontschs a Berna

■ (anr/abc) 70 vuschs han resunau dumengia vargada en ed avon la baselgia principala da Berna. Il chor viril Ligia Grischa ha dau concert ella capitala ensemen cul chor mischedau Pro Arte da Berna. Omisdu contan sut la bitgetta da Christoph Cajöri. Il Münster da Berna ei la pli gronda ed impurtonta baselgia dil temps medieval tardiv dalla Svizra. Semeigliant sco la baselgia da Notre-Dame da Paris eis ella in monument historic marcant ed ils Bernes ein fetg attatschai a quel. Dumengia vargada ha il chor viril Ligia Grischa schau resunar leu «Il pur suveran». Gia avon 120 onns, a caschun dalla fiasta federala 1899, havevan els cantau en quei liug quella canzun che Hans Erni aveva cumponiu aposta cul text da Gion Antoni Huonder. Igl ei pia buca l'emprema gada ch'il chor sursilvan ei viagiava ella capitala. L'emprema gada ei quei stau igl onn 1864. Lu fuva la Ligia Grischa separticipada alla 2.

Fiasta federala da cant. Gion Antoni Huonder aveva scret ina poesia per quella caschun, il cumponist turitges Ignaz Heim la musica leutier. Cun «A Trun sut igl ischi» havevan ils 23 cantadurs fatg gronda sensaziun e rendiu honur alla Romontschia. Als chors grischuns ha quei success d'avon 155 onns dau in grond stausch.

Pli tard ei la Ligia Grischa separticipada aunc duas gadas a fiastas federalas a Berna, e quei ils onns 1899 e 1948. Dumengia vargada ein ils 70 cantadurs digl onn da cant 2018/19 sepresentai el chor dil Münster da Berna. Pia suenter 71 onns puspei ina presentaziun en quei edificiu historic. Suenter in cuort exerzezi che Christoph Cajöri ha fatg cun omisdu chors – en tut 140 persunas – ein ils bauns s'empleni. Cu il concert ha entschiet allas 17.00 fuvan varga 700 persunas en baselgia. Ils chors han schau resunar l'oraziun «Gospodj pomiluj». Il program dalla Ligia

Grischa ei staus semeigliants al concert d'in'jamna avon a Glion. Il chor partenari Pro Arte ha medemamein cantau canzuns sacras russas. Ella baselgia gotica culs aults pilasters ed arviuls han omisdu chors implorau, urau e ludau cun canzuns ord la liturgia da Christostomus. La Ligia Grischa ha era schau resunar canzuns profanas, denter auter la popolar «Schi lunsch naven» da Tumasch Dolf. Suenter il concert en baselgia ha il chor sursilvan dau in cuort concert spontan avon il portal dil Münster. Denter autras han tschiens persunas giu tschaf-fen dil himni «Schi ditg che statan cuolms e vals» e secapescha «Il pur suveran» da Hans Erni. L'acustica sil Münsterplatz ha dau ina impressiun digl eveniment che fuva staus 1862 a Berna el medem liug. Cun quei viadi ha il chor viril Ligia Grischa concludiu il program digl onn da cant 2018/19. Il niev onn 2019/20 entscheiva ils 26 d'october culla radunonza generala.



FOTO E. CAPAUL

Observaziuns dalla natira

■ Sin ina pintga spassegiada egl uaul da Lumbrein sun jeu fruntaus casualmein sin in'interessanta observaziun. Mirondempau sur e sut via hai jeu en-

gartau ina cuscha cun ina fuorma empau pli curiosa. Confrontand quella empau pli da rudien e pli da maneivel hai jeu fatg persenn ch'ei savess era es-

ser ina sculptura en fuorma d'animal. Sch'ins va cun eglis aviarts tras la natira e lai reger la fantasia san ins far bein enqual scoperta.

Erwin Capaul



Il chor viril Ligia Grischa ha dau concert el Münster da Berna.

FOTO G. BEELI

NOVITADS WWW.RTR.CH

Gronda participaziun al marsch da malencurada

3500 persunas hajan participà al marsch ch'è vegni organisà la dumengia a Cuira per il buob da 14 onns ch'è sa disgrazià durant il «Maiensäss». Quai communitgescha il cussegel da la citad. Las persunas èn vegnidas ensemen a las 17.00 ed èn lura chaminadas cun chandailas e fotografias dal buob da la Halla da la citad da Cuira tras la citad veglia fin a la Quaderwiese. Là han lura amis da la famiglia e conscolaras e conscolars dal buob drizzà plets da confiart a la famiglia en cordoli. Enconuschents da la famiglia dal buob avevan appellà al marsch da malencurada. La gievgia passada era il buob da 14 onns crudà var 200 meters d'ina spunda taissa giu cun turnar a chasa dal «Maiensäss».

Bunas prognosas per stagiun da stad

Ils signals per la stagiun da stad sajan buns, quai scriva l'Institut da perscrutaziun da la conjunctura KOF en sia nova prognosa per il turissem. Ils buns resultats dal turissem svizzer l'enviern passà pudessan cuntinuar la stad che vegn. Per l'entir onn 2019 spetga l'Institut radund 1,5% dapli pernottaziuns.

Cuppa Spengler 2019

La Cuppa Spengler ha annunzià il glindesdi las sis equipas per la 93avla ediziun dal turnier da tradiziun tranter Nadal e Bumaun. Sper l'equipa finlandaisa TPS Turku, il campiu da la Tschechia, Ocelari Trinec, vegn era Salavat Yulaef Ufa da la Russia a dar ses comeback sin glatsch svizzer. Da la partida èn natiralmain era las duas equipas da tradiziun, il Club da hockey da Tavau ed il Team Canada sco er ils Tessinais d'Ambri-Piotta.



Il gaud da Panaduz è pertutgà da las consequenzas da la midada dal clima.

RTR

Gauds pateschan da la sitgira

■ En la Svizra centrala è il dumber da pigns sa reduci dapi il 2005 per in terz. Tscherts plazz dals pigns han autras plantas conquistà, en auters svanescha il gaud dal tutfatg. Quest fenomen ch'il gaud svanescha or da las regiuns pli bassas sa mussa er en il Grischun.

Uschia reagescha il gaud sin la midada dal clima. Il clima ch'è dapi ils onns 80 daventà en media 1,5 °C pli chaud en Svizra. Ch'igl è pli savens sitg e chaud è tenor l'expert Andreas Rigling da l'Institut federal per la perscrutaziun da gaud, naiv e cuntrada be ina part dal problem. Pli grond vegnia quel sch'i dettia sper la sitgira er anc orcans sco Lotar, Vivian u Burglind. Lura vegnia, sco quai ch'igl è actualmain il cas, il bau e chaschunias gronds donn.

Privel per economia e gauds da protecziun

La natira, pia il gaud s'adatteschia tant al bau sco a la midada dal clima. Uschia na sajan las consequenzas dad orcans u er da gronds incendis da principi nagin problem per il gaud sez.

Il problem sa dettia là nua ch'il carstgaun spetgia insatge dal gaud. P. ex. sco possessur che viva da la vendita da lain pign d'alta qualitat u lura cunzunt er tar il gaud da protecziun sco quai ch'i dat blers en il Grischun. I n'è betg uschè trivial sch'ils gauds da protecziun cunter crudada da crappa en las autezzas amez la regiun da Cuira cumenzan a sa schliar. Il pign è en blers gauds nizzegiads per la produc-

ziun da lain u er en blers gauds da protecziun la planta principala. Pussaivladads da reagir sin il fatg che cunzunt els pateschan da la midada dal clima datti differentas: – Tras reducir il dumber da pigns en in gaud ha mintga singul dapli aua a disposiziun. – Guardar che betg l'entir gaud saja tuttina vegl.

– Maschadar las sorts: Per il Grischun cusseglia l'expert il pign, l'aviez, il fau ed il culaischen.

– En general: Survegliar bain ils gauds ed eliminar problems uschè svelts sco pussaivel.

La varianta da reducir il dumber da plantas sa morda però cun la finamira dal gaud da protecziun. Quel adempleschia numnadain il meglier sia funcziun cun uschè bleras plantas e pigns sco pussaivel, uschia l'expert. Perquai è là plitost la maschaida tenor sorts e vegliadetgna adattada.

Tenor Rigling na saja quai anc betg tschintg avant las dudesch, ma ins stoppia reagir. Gist da transferir in gaud cun ina sort da pign e dal tutfatg tuttina vegl en in gaud maschadà da sorts e vegliadetgna, quai dovria decennis. Ils selviculturs, spezialmain en il Grischun sco chantun ferm pertutgà da la tematica, sajan però conscients da la problematica.

Tuttina restan tenor l'expert anc blers segns da dumonda. Ins n'haja numnadain anc mai vis tantas plantas e pigns morts en ina giada sco ils onns 2018 e 2019. E qua manchian er anc las experientschas co ir enturn cun questa midada.

Vendì damain pass da skis Surselva

■ (rtr) La purschida communal da las sis pendicularas da la Surselva, il pass da la Surselva sa reducescha onn per onn. Uschia èn vegnids vendids la stagiun passada 720 pass da la Surselva. Quai è in minus da 8,3% u 65 cartas pli pauc che la stagiun 2017/2018.

En cumparegliaziun cun la media da tschintg onns è quai in

minus da quasi 16%, u la stagiun 2014/2015 eran anc vegnids vendids 1030 pass da la Surselva.

Purschida vegn mantegnida

Per il president da l'uniun Maurus Tomaschett èsi cler che la purschida vegn mantegnida vinavant. Ina limita minimala da cartas vendidas na dettia quai betg, ha ditg Tomaschett. La purschida

saja surtut per indigens, ma era per persunas cun ina abitaziun da vacanza. Il pli savens vegn la carta cumprada en il territori da skis da Sursaisa, nua che las pli bleras entradas primaras vegnan era nudadas.

Era l'Arena da skis da Sedrun-Andermatt ha nudà dapli entradas primaras la stagiun 2018/2019 che anc la stagiun avant.

L'AURA

Nagina aura da primavaira

Situaziun generala: Questa notg ha ina pressiun bassa ch'è vegnida da la Scandinavia er cuntanschì il Grischun.

Oz: En il Grischun central, en il nord dal Grischun ed en Surselva bunamain l'entir di plievgia.

Temperaturas en il nord da noss chantun dad 11 fin 14 grads. En il sid ed en l'Engiadina grisch, bletsch e temporals.

Temperaturas en il sid fin 21 grads ed en l'Engiadina'Ota enturn 13 grads.

Prognosa: Mesemna en il Grischun central ed en il nord plitost grisch cun intgins temporals e blera plievgia.

